


***MGA LEKSYON ALANG SA
KRISTOHANONG KINABUHI***



USA KA CORSO NGA PINAAGI SA PAGPADALA

Minahal nga Magtutuo,

Kalipay namo sa pagtanyag kanimo niining kurso sa Pulong sa Dios. Ang imong teksto mao ang Bag-ong Pakigsaad. Kini nagpahayag sa kinabuhi sa atong Ginoong Jesu-Kristo. Kami nanghinaut nga ang kurso makapahimuot kanimo ug makatabang sa imong kinabuhi.

Ang kurso adunay bahin sa mga pagsulay sa tunga niining libro. Sa pahina 2 sa mga pagsulay ikaw makakaplag sa detalye sa mga pahimangno alang sa pagtuon niini nga kurso.

ANG MGA BUNGA SA PAGKATAWO PAG-USAB SA ESPIRITU

Unsa man gayud ang tinuod nga panghitabo sa diha ang usa matawo pag-usab?

Una, ang usa ka tawo makasabot nga siya usa ka nahisalaag nga makasasala ug angayan sa pagpuyo nga dayon sa Impyerno. (Bugtong ang Balaang Espiritu ang makahimo sa pagpasabot niini.) Sa lain nga mga pulong, siya nag-ila nga sa atubangan sa Dios nga siya usa ka makasasala ug nagkinahanglan sa usa ka Manluluwas. Siya nagdawat ni Jesu-Kristo nga iyang Ginoo ug Manluluwas, ug niana nga higayon siya natawo pag-usab sa espiritu, ang iyang mga sala gipasaylo, ug siya nakadawat sa kinabuhing dayon gikan sa Dios.

Apan kana usa lamang ka gamay nga bahin sa sugilanon. Kini ang sinugdanan pa lang. Atong makat-onan gikan sa Biblia, nga sa diha ang Dios magluwas sa usa ka tawo, daghang mga kahibulongang mga butang ang nahitabo. Adunay lista sa napulo ka mga kahibulongan nga mga kamatuoran.

1. Sa pagsugod, ang magtotoo nahimong dinawat diha sa hinigugma (Efeso 1:6); kini nagpasabot nga siya anaa sa presensiya sa Dios uban sa tanan nga pagdawat nga anaa sa Iyang Hinigugma nga Lalaking Anak. Ang Dios nakakita kaniya nga anaa ni Kristo (II Korinto 5:17). Kini usab nagpasabot nga ang Kristohanon gikalipay nga moabot sa atubangan sa Dios sa bisan unsa nga takna. Tungod nga si Kristo gikalipay nga moabot; oo, kini nagpasabot nga sa kanunay (Efeso 2:6,7).
2. Siya usab nahimo nga usa ka anak sa Dios (Juan 1:12). Makahimo ba ikaw sa paghunahuna unsa ikaw ka halangdon ug mobati nga ikaw usa ka lalaking anak sa bantugan nga punoan dinhi sa kalibutan? Unsa pa kaha ka daku nga kadungganang nga mahimong usa ka anak sa gamhanang Magbubuhay sa kalibutan, nga sa iyang atubangan ang mga anghel nagyukbo (Galacia 3:26)!
3. Siya gimatarung sa Dios (Roma 5:1; 8:30,33). Ang Dios, nga Maghuhukom, nagpahayag sa makasasala nga nagtoo “GIMATARUNG” ug nakakita kaniya sama nga siya wala makasala. Ang Dios makahimo niini tungod kay si Kristo namatay ingon nga ilis sa atong dapit ug mipas-an sa tanang silot nga ang Kristohanon unta ang mag-antos. Sa ingon niini nga paagi, ang Kristohanon gipasundayag nga “walay sala” sa atubangan sa Dios ug dili gayud pagasilotan alang sa iyang mga sala (Roma 8:1).

4. Siya giusab ngadto sa pagka templo sa Balaang Espiritu (I Korinto 6:19). Ang Biblia nagtudlo kanato sa tin-aw nga ang Dios nga Balaang Espiritu nagpuyo gayud diha sa matag usa nga magtotoo (I Juan 4:13). Ang lawas sa Kristohanon usa ka templo sa Balaang Espiritu. Tungod sa balaan nga kahigayonan, ang anak sa Dios kinahanglan mabinantayon uban sa kon unsa iyang mga gipamulong, unsa ang iyang mga buhat, ug asa siya molakaw.
5. Siya nahimong usa ka sakop sa pamilya sa Dios (Juan 1:12). Karon siya mahimong mabautismohan sumala sa paagi sa Biblia. Unya siya mahimong usa ka sakop sa lokal nga iglesia (Buhat 2:41,47). Sama nga ang iglesia sa Colossas mao ang “lawas ni Kristo,” ang usa ka Kristohanon mahimong usa ka bahin sa “lawas ni Kristo” pinaagi sa pag-apil sa usa ka lokal nga iglesia (Colossas 1:18,24).
6. Siya nahimong usa ka sumusunod sa bahin sa Dios (Roma 8:17). Ang Dios mao ang Magbubuhat sa kalibutan ug Siya ang tag-iya sa tanang mga butang. Siya nagsaad sa mga anak sa Dios nga, usa ka adlaw, sila maghari uban ni Kristo ibabaw sa kalibutan ug unya sila manag-iya sa tanang mga butang.
7. Siya nahimong usa ka balaan (Roma 1:7). Ang Biblia nagtawag kanila nga naluwas, “mga balaan”. Ang usa ka balaan mao ang usa nga gipalahi alang sa Dios pinaagi sa Balaang Espiritu (Salmo 4:3). Sa mga mata sa Dios, ang matag Kristohanon usa ka balaan, tungod kay ang Dios nakakita kaniya pinaagi ni Kristo ug si Kristo hingpit nga balaan (I Korinto 1:2).
8. Siya nahimong kompleto diha ni Kristo (Colossas 2:10). Ang Kristohanon hingpit atubangan sa Dios. Siya sama ka duol ug sama nga paghigugma sa Dios sama ni Kristo. Sa diha nga ang usa ka tawo nakadawat ni Kristo, siya nakaangkon sa tanan nga gikinahanglan alang sa malipayon nga kinabuhi ug sa dayon.
9. Siya nagdawat sa usa ka balaan nga kinaiya (II Pedro 1:4). Siya sa dili madugay makamatikod nga siya adunay bag-o nga mga tinguha, bag-o nga mga pangandoy, ug bag-o nga pagdumot sa sala, ug usa ka bag-o nga gugma alang sa iyang Kristohanon nga igsoon. Sa diha nga kining balaan nga kinaiya gikaon sa Kristohanon, siya sa dugang mahimo nga sama ni Ginoong Jesus (Colossas 3:10,11; II Corinto 3:18). Kini ang plano sa Dios sa matag usa sa Iyang mga anak.
10. Siya dihadiha magsugod sa pagkalipay sa kanunay nga panalipod sa Dios (Roma 8:28). Walay mahitabo ngadto sa usa ka Kristohanon nga walay pagtugot gikan sa Dios. Sa lain nga mga pulong, walay mga aksidente sa kinabuhi sa usa ka Kristohanon. Ang matag panghitabo

ngadto sa usa ka anak sa Dios alang sa iyang kaugalingon nga kaayohan. Bisan ang mga pagsulay, mga kalisdanan, ug mga silot magbuhat alang sa espirituhanon nga kaayohan (Roma 5:3-5).

Busa, ang tinuod nga Kristohanon sa pagkatinuod adunay kahibulongan nga kinabuhi. Sa pagtan-aw niining mga kahibulongan nga mga gihatag sa Dios, ang matag Kristohanon kinahanglan magpakita sa iyang pagpasalamat sa duha ka mga paagi:

1. Siya kinahanglan dili mohunong sa pagdayeg sa Dios alang sa kaluwasan nga iyang naangkon pinaagi ni Ginoong Jesu-Kristo.
2. Siya kinahanglan maghatag sa iyang kinabuhi sa kinaugalingon nga pag-alagad ngadto Kaniya kinsa mihatag sa Iyang kinabuhi didto sa krus sa Kalbaryo (Roma 12:1).

KASIGUROHAN SA KALUWASAN

Unsaon sa usa ka tawo sa pagkasayud nga siya sigurong naluwas?

Pagbasa ug pamalandong sa mga mosunod nga mga punto hangtud nga ikaw hingpit nga nakasabot kanila.

1. Ang Biblia mao ang Pulong sa Dios. Kini hingpit nga matarung. Ikaw sa hingpit makasalig diha niini.
2. Ang Biblia nagsulti nga kon ikaw maghinulsol sa imong mga sala ug magtoo sa Ginoong Jesu-Kristo, ikaw maluwas.
3. Ang pangutana karon mao kini, nakaduol na ba ikaw ngadto ni Jesus ingon nga makasala ug mitawag Kaniya sa pagluwas kanimo? Nakadawat na ba ikaw Kaniya ingon nga puli kanimo kinsa mibayad sa silot sa imong mga sala?
4. Kon ikaw nakahimo na, ang Dios nagsulti nga ikaw naluwas.

Sa lain nga mga pulong, ug kini mahinungdanon kaayo nga ikaw nakasabot pag-ayo niini, ang kasigurohan sa kaluwasan maangkon pinaagi sa mga Kasulatan. Kini nga kamatuoran tin-aw nga gitudlo diha I Juan 5:13. Ang matag Kristohanon kinahanglan nga makasag-ulo niining nga bersikulo: “Kining mga butanga gisulat ko nganha kaninyo nga nagtoo sa ngalan sa Lalaking Anak sa Dios; aron kamo mahibalo nga kamo nakabaton sa kinabuhing dayon, ug nga kamo magtoo sa ngalan sa Lalaking Anak sa Dios.”

Tan-awa ang pagkamahinungdanon sa pulong nga gikudlitan. Si Juan misulat ngadto kanila nga nagtoo diha ni Kristo aron nga sila makahibalo nga sila nakabaton sa kinabuhing dayon. Kon ikaw nagtoo diha ni Kristo, ikaw naluwas. Ang Biblia nagsiguro kanimo niini.

Ang suliran mao nga daghan sa katawhan anaa niini nga sila nagsalig sa ilang mga pagbati kay sa Biblia. Sila moingon, “Ako wala magbati nga naluwas”. Siya nagdahum sa usa ka misteryosong kasinatian sa pagbati, ug sa diha nga sila dili makaangkon niini, sila nagduhaduha nga sila naluwas ba. Ang tawo nga nagpasikad sa kasigurohan sa iyang kaluwasan sa mga pagbati makasiguro nga adunay mga kalisdanan tungod kay ang iyang mga pagbati kanunay nga nagkausab gikan sa usa ka higayon ngadto sa sunod. Ang Pulong sa Dios, hinuon, dili mausab. Salig sa Biblia ug dili sa imong mga pagbati.

Apan, usahay ikaw mangutana sa imong kaugalingon, “Dili ba angay nga ang Kristohanon kinahanglan mobati sa kalipay?” Walay duda mahitungod niini, ang tubag mao, “Oo!” Hinuon kinahanglan ang usa mahibalo nga siya naluwas sa dili pa siya makabaton niana nga kalipay. Una moabot ang kasigurohan, unya ang mga pagbati. Kita mahibalo nga kita naluwas tungod kay ang Biblia nagsulti

kanato. Kita nalipay tungod kay kita nahibalo nga kita naluwas.

Gawas sa Kasulatan, adunay lain nga mga paagi sa kasigurohan sa kaluwasan alang sa magtotoo. Ania ang tulo ka mga kamatuoran nga nagpalig-on nga ang usa ka tawo naluwas na;

1. Ang naluwas nga tawo mahigugma sa iyang Kristohanon nga igsoon (I Juan 3:14).
2. Ang naluwas nga tawo adunay pamatuod sa Balaang Espiritu sulod kaniya (I Juan 5:10; Roma 8:16).
3. Ang naluwas nga tawo nagdumot sa sala ug nahigugma sa matarung. Bisan sa kamatuoran nga ang usa ka Kristohanon makahimo sa sala, ang sala wala magdumala sa iyang kinabuhi (Roma 6:19). Siya dili magpuyo sa pagpadayon sa pagbuhat sa sala.

Samtang ang magtotoo magtubo diha sa iyang Kristohanon nga kinabuhi, ang kasigurohan magtubo sa matag adlaw. Adunay tulo ka mga lakang nga magsiguro niini:

1. Pagbasa sa Biblia nga makanunayon ug pagtoo niini uban sa tibuok mong kasingkasing.
2. Pangayo sa Ginoo sa paglig-on sa imong pagtoo samtang ikaw nagbasa sa Iyang Balaang Pulong.
3. Pagsulti sa uban mahitungod Kaniya nga nagluwas kanimo gikan sa sala.

Sa katapusan, adunay gamay nga tambag alang niadtong wala makasiguro nga sila naluwas ug sa tinuod buot niana nga kasigurohan. Tingali ikaw naghunahuna nga sa miaging panahon ikaw misalig diha sa Manluluwas, apan wala gayud makasiguro kon ikaw nakahimo o wala. Kon ikaw buot niana nga kasigurohan, kini ang angay nimo nga buhaton. Sultihi ang Ginoo nga ikaw wala makasiguro nga ikaw naluwas, apan nga karon ikaw nagtinguha nga maluwas. Pagsulti Kaniya nga ikaw nasayud nga ikaw nawala nga makasasala ug nga kon ikaw mamatay sa imong kahimtang karon, ikaw moadto sa Impyerno. Unya pagdawat sa Ginoong Jesu-Kristo nga imong Manluluwas, nga nagtoo nga Siya namatay sa krus sa Kalbaryo sa pagkuha sa tanang silot alang sa imong mga sala ug magtoo nga Siya makahimo, ug buot, moluwas kanimo.

Karon, basaha ang Mga Buhat 16:31. Unsa ang gisulti niini nga mahitabo kon ikaw magtoo sa Ginoong Jesu-Kristo? Kini nagsulti, “ikaw maluwas.” Kini ang Pulong sa Dios. PAGTOO NIINI. Sa diha nga si Satanas moduol diha kanimo ug mosulay sa paghimo kanimo nga magduha duha sa imong kaluwasan, basaha ang Mga Buhat 16:31; Juan 1:12; 3:36; 5:24; o Roma 10:9. Ipakita ni Satanas nga ang Dios nagsulti nga ikaw naluwas tungod kay ikaw nagtoo diha ni Kristo. Kon ikaw magpakita kaniya sa Kasulatan, siya dili na magsamok kanimo uban sa lain nga mga pagduhaduha.

KANUNAY NGA PAGPANALIPOD

Ang naluwas nga tawo malaglag pa ba?

Kon ang usa tinuod nga natawo pag-usab, siya dili na gayud malaglag. Ang magtotoo luwas na ug siguro sa kahangturan. Ingon nga ebidensya niining mahimayaon nga kamatuoran, adunay pito ka mga pasahe ang gilista, bisan daghan pa ang mahimong mahisgotan. (Ang magtutuon kinahanglan magtuon sa matag usa nga mabinantayon).

1. Juan 10:27-29 - Tan-awa ang mga pulong ni Kristo, “Ug ako maghatag ngadto kanila sa kinabuhing dayon: ug sila dili na gayud malaglag”. Itanom ang imong kaugalingon nga malig-on niini nga kamatuoran. Kini usa ka walay kondisyon nga saad gikan ni Kristo. Walay usa sa iyang karnero nga malaglag! Tan-awa, usab, nga si Kristo ug ang Amahan magbantay kanimo nga luwas.
2. Juan 5:24 - Dinhi ang Ginoong Jesu-Kristo nagsulti pag-usab. Siya nagsaad nga ang tawo nga nakabati sa Iyang Pulong ug nagtoo Kaniya Kinsa mipadala Kaniya, adunay kinabuhing dayon ug dili makakita sa dayon nga hukom sa silot. Kon ang usa ka magtotoo mahimo nga mawala, nan ang Lalaking Anak sa Dios napakyas sa Iyang saad.
3. Juan 3:36 - “Siya nga nagatoo sa Lalaking Anak sa Dios adunay kinabuhing walay katapusan”. Tan-awa kini wala magsulti “mahimong makaangkon sa kinabuhing dayon.” Siya nakabaton na niini karon nga panahona. Karon, unsa ka daku sa panahon ang “dayon” ? Sa tin-aw kini nagpasabot nga sa kahangturan.
4. Roma 8:38, 39 - Si Apostol Pablo nagsulti kanato nga dili ang kamatayon, ni kinabuhi, ni mga anghel, ni kahabugon, ni kaladmon, ang makahimo sa pagpabulag sa Kristohanon gikan sa gugma sa Dios. Ug aron nga walay anak sa Dios nga mabalaka nga siya makabulag sa iyang kaugalingon gikan sa gugma sa Dios, si Pablo nagdugang, “ni adunay lain nga binuhat.” Ang magtotoo nakasiguro sama sa mahimo sa Dios kaniya.
5. II Timoteo 1:12 - Si Pablo nagpahayag dinhi sa iyang pagsalig nga si Kristo makahimo sa pagbantay ug makamintinar niadtong gitugyan ngadto sa iyang pagbantay. Kini nagpasabot sa iyang kalag. Diha sa Juan 6:39, kita makabasa nga ang Dios naghatag ngadto ni Kristo sa pagbantay sa tanan nga mga magtotoo. Mahimo ba kini ni Kristo nga dili matinumano niadtong gitugyan ngadto Kaniya?
6. Judas 24 - Si Ginoong Jesus mao ang bugtong usa nga makahimo sa pagbantay sa mga Kristohanon gikan sa pagkahulog ug magdala kanila

nga luwas ngadto sa ilang balay sa Langit. Ang mga Kristohanon dili makahimo sa pagmintinar sa ilang kaluwasan sama nga sila wala makahimo sa pag-angkon niini sa ilang kaugalingon sa unang higayon; apan si Kristo makahimo (I Peter 1:5).

7. Roma 8:30 - “Ug si kinsa ang iyang gimatarung, kanila siya usab nagmatarung”. Ang matag luwas nga tawo usab gihimaya. Bisan tuod ang mga Kristohanon wala makaangkon sa ilang gihimaya nga mga lawas, kini usa ka siguro nga butang nga ang Dios nagsulti nga kon kini nahitabo na. Kon ikaw gimatarung, nan kon mahitungod sa Dios ang hisgotan, ikaw usab gihimaya. Sa lain nga mga pulong, ang Kristohanon makasiguro sa pag-adto sa Langit sama nga kon siya anaa na didto.

Sa pagsumpay sa tema sa kasigurohan sa Kristohanon, ang mosunod nga mga butang gikinahanglan nga pagaisipon:

1. Ang Kristohanon dili mawad-an sa iyang kaluwasan sa diha nga siya makasala. Si Kristo nagbayad na alang sa iyang mga sala; sa miagi, karon, ug sa umaabot. Ang Dios dili maningil sa bayad makaduha. Tungod kay si Kristo namatay alang sa akong mga sala, ako dili na mamatay alang kanila. Ang Dios, ang matarung nga Maghuhukom, nagpasaylo sa makasasala nga nagtoo diha ni Kristo.
2. Hinuon, sa diha ang usa ka Kristohanon makasala, siya nakapasilo sa iyang Langitnong Amahan ug ang malipayon nga relasyon nga miabot taliwala sa usa ka anak ug sa iyang amahan mawala hangtud ang sala masugid (I Juan 1:9). Pagbantay nga adunay daku nga kalainan sa relasyon taliwala sa Dios nga Maghuhukom ug ang makasasala, ug sa Dios nga Amahan ug sa anak nga nakasala. Sa unang kahimtang, ang bayad alang sa sala mao ang kamatayon ug impyerno. Diha sa ikaduhang kahimtang, ang resulta sa sala mao ang nahunong nga pakigdait. (I Juan 2:1,2).
3. Ang sama nga Kristohanon dili makasala nga walay mga silot. Kon ang usa ka anak sa Dios magpalayo sa iyang kaugalingon gikan sa Amahan, siya magdahum sa pagtul-id (Hebrohanon 12:6, 7). Ang Dios mahimong mogamit sa kasubo o pag-antos sa pagpabalik kaniya. Sa daghan nga kahimtang, ang Dios makahimo bisan sa pagdala sa magtotoo ngadto sa langit. Ang iyang lawas mamatay, apan ang iyang kalag maluwas (I Korinto 5:5).
4. Samtang ang Kristohanon makahimo ug makabuhat sa mga sala, walay tinuod nga anak sa Dios nga magkinabuhi sa padayon nga pagkinabuhi sa sala. Dili nga ang Kristohanon dili makasala, apan hinuon siya makabuhat sa gamay nga sala. Kon ang usa ka tawo magpadayon sa pagpakasala nga walay pagbalik ngadto sa Dios ug masilotan, kini usa ka dayag nga ilhanan nga siya wala gayud matawo pag-usab. Ang atong

paniguro sa kaluwasan kinahanglan dili usa ka pasangil sa pagpakasala, apan hinuon usa ka pahalipay sa dili pagpadayon sa sala.

5. Adunay daghan nga mga bersikulo sa Biblia nga daw nagpakita nga ang Kristohanon mahimong mawala. Hinuon, kon kita magsusi niini nga mga bersikulo nga mabinantayon, kita makabantay nga sila nagpasabot ngadto kanila nga nagpakaaron ingnon nga mga Kristohanon o kanila nga nahibalo sa dalan sa kaluwasan, apan misalikway niini. Walay dapit sa Kasulatan nga kini nagsulti nga siya nga tinuod nga natawo pag-usab sa espiritu malaglag.

KADAUGAN SA PAGTINTAL

Unsaon sa usa ka Kristohanon sa pagsukol sa makasasalang pagtintal?

Ang gubat taliwala sa matarung ug sayop nagsugod sa diha nga ang usa ka tawo naluwas. Siya nakabaton pa gihapon sa karaan nga kinaiya, ang makasasala nga kinaiya ni Adan, nga nagsulay sa pagbitad kaniya sa kanunay ngadto sa sala. Apan siya usab adunay bag-o nga kinaiya, ang balaan nga kinaiya, nga nagdumot sa sala ug nagtinguha sa pagbuhat sa matarung. Usa ka nagpadayon nga gubat ang nagsilaob taliwala sa duha ka kinaiya (Galatians 5:16,17; Roma 8:5-8).

Ang karaan nga kinaiya dili na maayo. Dili na kini molambo o makuha hangtud ang Kristohanon moadto sa iyang balay sa langit. Ang Dios naghukom sa pagsilot niini sa diha nga si Kristo namatay sa krus ug siya buot sa mga Kristohanon sa pagtagad niini ingon nga kini patay na. Ayaw pagdasig niini! Ayaw pagpakaon niini. Ayaw paghatag niini sa mga kahigayonan (Roma 13:14)! Ang bag-o nga kinaiya nagdasig sa Kristohanon sa pagbuhat unsa ang matarung. Kini ang kinahanglan dasigon ug pakan-on.

Kini ang pamaagi sa Kristohanon sa pagsukol sa pagtintal — nga magaingon “Dili!” ngadto sa unod o sa daan nga kinaiya, ug magpakaon sa bag-o nga kinabuhi nga anaa sulod kaniya. Ang mosunod mao ang pipila ka mahimo nga mga sugyot mahitungod nga unsaon sa pagbuhat niini:

1. Pagbasa sa Biblia! Pagtuon niini! Pagsag-ulo niini. Pagsugot niini! Basaha ang Salmo 119: 9 ug 11. Atong makat-onan dinha, nga ang Pulong sa Dios nagtudlo unsaon sa paglikay sa sala. Paghimo sa imong kaugalingon nga makagahin alang sa panahon sa pagbasa sa Pulong sa Dios (Colossas 3:16).
2. Pag-ampo! Bisan kanus-a nga ikaw gitintal, pangayo sa Dios sa pagtabang kanimo (Hebrohanon 4:16). Siya mohatag kanimo sa gahum sa pagbuntog sa pagtintal (I Korinto 10:13). Kon ikaw mosulay sa pagsukol sa pagtintal uban sa kuagalingon nimo nga kusog, dili malikayan nga mapakyas ka.
3. Pangitaa ang pagpakig-uban sa uban nga mga Kristohanon ug dili sa mga makasasala (Panultihon 1:10-16); Mga Hebrohanon 10:24,25). Sa kadaghanan gikinahanglan kini nga magbuhat ug magpuyo uban sa mga dili magtotoo, ug diha nga kahimtang, kita magpamatuod uban sa atong mga dila ug uban sa atong kinabuhi nga kita iya ni Kristo. Kita kinahanglan dili na makigbahin sa kalibutanon nga kalipay ug mga bisyo (Efeso 5:11).
4. Pagsugid sa imong mga sala dihadiha. Sama nga ikaw nakamatikod nga ikaw nakapahiubos sa imong Amahan pinaagi sa imong hunahuna, buhat, o pulong, ikaw kinahanglan mangayo sa Iyang pasaylo dihadiha. Ayaw

paghulat hangtud sa katapusan sa adlaw o sa semana sa pagbuhat niini (Mga Panultihon 28;13).

5. Pagkugi diha sa buluhaton sa Ginoo! Adunay miingon nga ang walay sulod nga hunahuna mao ang buhatan sa yawa. Ihatag ang imong hunahuna ug lawas ngadto sa Ginoo ug pagtugot kaniya nga mogamit niini samtang siya buot pa (Roma 6:19). Adunay daghan nga pagabuhaton ug ikaw nag-alagad sa Agalon sa mga agalon.
6. Paningkamot alang sa lawasnon nga ehersisyo! Ang lawasnon nga ehersisyo adunay kaayohan (I Timoteo 4:8). Tungod kay ang lawas sa magtotoo mao ang templo sa Balaang Espirito, ikaw kinahanglan maghimo sa mga paagi nga mopabilin niini nga malig-on ug maayo. Hinuon, dili nimo tugotan ang paugnat sa kusog sa pagkuha sa mahinungdanon nga dapit sa imong kinabuhi sa pagpuli sa espirituhanong mga butang.
7. Ayaw paghatag sa bisan unsa nga dapit ngadto sa karaang kinaiya! Pagbantay unsa ang imong ginabasa, unsa ang imong makita, asa ka paingon, ug unsa ang imong mabati (Kolossas 3:5-9).
8. Pakan-a ang bag-ong kinaiya. Pagbuhat uban ni Kristo! Sa diha nga ikaw maghunahuna kaniya, ikaw dili makahunahuna sa sala (Kolossas 3:10-14). Ang paghago sa imong hunahuna uban ni Kristo mao ang tinuod nga sekreto alang sa balaang kinabuhi. Usa kini ka sumbanan sa atong kinabuhi nga kita mahisama nianang atong gisimba. Ang II Korinto nagtudlo kanato nga kita mahisama ni Kristo sa dihang kita magtan-aw Kaniya pinaagi sa salamin sa Iyang Pulong. Kita mausab ngadto sa Iyang panagway pinaagi Balaang Espirito nga nagpuyo dinhi kanato.

Usa ka panapos nga pulong. Ikaw makabantay pinaagi sa nasulti nga ang gawasnon gikan sa pagtintal dili usa ka usa ka higayon nga eksperensya; apan usa ka nagpadayon nga pamaagi sa pagsalig sa Dios. Dili mahinungdanon unsa ka dugay kita nga nahimong Kristohanon o bisan unsa ka daghan ang atong nahibaloan sa Biblia, kita anaa pa gihapon sa kakuyaw sa paghatag ngadto sa pagtintal kon kita mokuha sa atong mga mata gikan sa atong Ginoo (Kolossas 3:1-4).

KRISTOHANON NGA PAGKINABUHI

Unsaon sa usa ka Kristohanon sa pagkahibalo unsa ang iyang buhaton o dili buhaton?

Maayo ba kini alang sa usa ka Kristohanon sa pag-adto sa mga sayawan o sinehan, sa pagsugal, pagsigarilyo, paghubog, o pag-apil sa mga kalibutanon nga kahilayan?

Daghang mga batan-on nga Kristohanon ang nabalaka mahitungod sa nahisgotan sa ibabaw nga mga butang ug daghang mga sama nga buluhaton. Sila nakakita sa pipila ka mga buhat nga dayag kaayo nga gipanghimaraut sa Biblia, apan daghang uban nga gihisgotan. Ang katuyoan niini nga leksyon mao ang paghatag sa magtutuon uban sa usa ka sumbanan nga motabang kaniya sa pagpili kon siya moapil sa mga kadudahan nga mga buhat.

1. Una sa tanan, usa ba kini nga gidili sa Ginoo alang sa Kristohanon sa pagbuhat? Kon mao kini, nan paglikay niini sama sa makamatay nga sakit. Kon ikaw dili siguro, ayaw pagbuhat niini hangtud nga ikaw adunay higayon sa pagsusi niini (I Tesalonika 5:22).
2. Sunod, ang Dios ba ang makakuha sa himaya gikan niini? Diha sa I Korinto 10:31 atong mabasa ang mosunod, “pagbuhat sa tanan alang sa himaya sa Dios.” Sa dili pa ikaw moapil sa kadudahan nga buhat, makapangayo ba ikaw sa Dios sa pagpanalangin niini, nagtoo nga Siya mapasidunggan pinaagi sa imong pag-apil niana nga butang?
3. Iya ba kini sa kalibutan? Kon mao kini, nan kini dili iya ni Kristo. Siya miingon sa iyang mga tinun-an, “Sila dili iya sa kalibutan, bisan sama nga ako sa kalibutan.” (Juan 17:16). Siya dili “iya sa kalibutan” sa bisan unsa nga butang. Siya dinhi sa kalibutan, apan dili kabahin niini (I Juan 2:15-17).
4. Ang Ginoo ba mibuhat kaha niini? Siya nagbilin kanato sa usa ka sumbanan aron nga kita makasunod sa iyang mga lakang (I Pedro 2:21).
5. Buot ka ba nga magbuhat niana sa takna nga ang Ginoo mobalik? Adunay maalamon nga miingon, “Ayaw pagbuhat sa bisan unsa nga butang, ayaw pagsulti sa bisan unsang butang, ayaw paglakaw ngadto sa bisan unsa nga dapit nga makapaulaw kanimo kon ang Ginoo mobalik dihadiha.” (I Juan 2:28).
6. Makabuhat ba ikaw niini nga gawasnon naghunahuna nga ang Dios, ang Balaang Espiritu, nagpuyo diha kanimo? “Unsa wala ba kamo mahibalo nga ang inyong lawas mao ang templo sa Balaang Espiritu nga anaa kaninyo, nga inyong nadawat gikan sa Dios, ug kamo dili na sa inyong kaugalingon?” (I Korinto 6:19).

7. Usa ba kini ka buhat sa maayong anak sa Dios? Sa diha nga ang usa ka anak sa hari magkinabuhi nga dili maayo ug walay kadunggan, siya nagdala sa kaulawan sa ngalan sa iyang amahan. Ang susama mahitabo sa diha ang usa ka Kristohanon dili magbuhat sa maayo (Roma 2:24; Kolossas 1:10).
8. Unsa ang epekto niini ngadto sa uban? Mahimo ba kini nga maayong pamatuod ngadto sa mga dili magtotoo, o kini makahimo ba kanila sa paghunahuna nga walay kalainan taliwala sa usa ka Kristohanon ug sa dili magtotoo (II Korinto 5:17)? Usab, mahimo ba kini ka usa ka kapandolan ngadto sa usa batan-on diha sa pagtoo? Si Apostol Pablo nagpasidaan nga walay tawo nga mahimong kapandolan sa iyang igsoon (Roma 14:13).
9. Sa katapusan, adunay pagduhaduha ba sa imong hunahuna mahitungod sa buhat? Kon anaa, ayaw pagbuhat niini, tungod kay “siya nga nagduhaduha nahinukman” tungod kay “bisan unsa nga dili sa pagtoo, sala.” (Roma 14:23).

Sa paghunahuna niini nga tema mahitungod kon unsa ang buhaton o dili buhaton sa Kristohanon, maayo ang paghinumdom nga “kamo dili ilalum sa balaod, apan ilalum sa grasya.” (Roma 6:14,15). Kini wala magpasabot nga kita makabuhat sa bisan unsa nga buot nato, apan hinuon nga kita buot sa pagbuhat sa makapahimuot sa Dios tungod sa iyang nabuhat alang kanato. Kita kinahanglan maglikay sa kalibutanon nga kalipay ug mga - tungod kay kita buot nga maglikay kanila. Ang hinungdan nga kita buot maglikay kanila mao nga si Kristo namatay alang kanato ug kita buot sa pagpuyo sa usa ka matang nga makapahimuot Kaniya (II Korinto 5:14,15). Ang Dios wala magsulti nga kita mga Kristohanon tungod kay kita nagpalayo gikan sa kalibutanon nga kalipay; apan siya nagsulti ngadto sa mga Kristohanon: ikaw usa ka Kristohanon, “paglakaw nga takos sa pagtawag nga diin uban niini kamo gitawag.” (Efeso 4:1). Mahimo kini nga ang usa ka Kristohanon makalimot sa iyang hataas nga katungdanan ug moduko ngadto sa mga butang niini nga kalibutan. Diha niana nga kahimtang, ang Dios modala kaniya pagbalik pinaagi sa mahigugmaon nga pagtul-id, sama nga ang magbalantay mopahimutang sa iyang sungkod ngadto sa nawala nga nating karnero. Busa, kon ang Kristohanon makalimot sa grasya sa Dios, siya mapabalik pinaagi sa kusog sa Dios.

Dili kita malimot nga kini usab nagpugos kanato sa pagkamabinantayon sa paghatag sa mga balaod sa pagkinabuhi ngadto sa uban. Dili kita maghukom sa atong mga igsoon pinaagi sa atong kaugalingon nga mga sukdanan ug kulturanhong mga tradisyon (Roma 14:4). Hinuon, kon ang Pulong sa Dios naghukom niana nga buhat sa kinabuhi sa usa ka igsoon, dili kita magpasagad niini.

UNSA ANG BAUTISMO UG KINSA ANG KINAHANGLAN BAUTISMOHAN?

Sa wala pa ang Ginoong Jesus misaka ngadto sa Langit, Siya mihatag sa Iyang mga tinun-an sa dakung sugo, “Busa lakaw kamo, ug pagtudlo sa tanang mga nasud, nga magbautismo kanila sa ngalan sa Amahan, ug sa Lalaking Anak, ug sa Balaang Espiritu: nga magtudlo kanila sa pagsunod sa tanang mga butang nga akong gisugo kaninyo: ug tan-awa, ako uban kaninyo sa kanunay, bisan ngadto sa katapusan sa kapanahonan. Amen.” (Mateo 28:19,20).

Kini ang tinguha sa Dios nga, samtang ang mga tinun-an miadto libot sa kalibutan nga nagwali sa Maayong Balita, nga sila magbautismo niadtong mga midawat sa mensahe. Ang bautismo usa ka sugo nga gimugna pinaagi sa Ginoo sa iyang kaugalingon. Unya kini mohatod kanato sa duha ka mga pangutana: Una, giunsa pagbuhat ang sugo sa bautismo? Ikaduha, Unsa ang ipasabot sa bautismo?

Aron sa pagkaplag sa matarung nga tubag sa unang pangutana, atong basahon ang Mga Buhat 8:26-39. Dinhi kita makakita sa usa ka suluguon sa rayna sa Etiopia kinsa nagbiyahe diha sa usa ka karwahe ug nagbasa sa Daang Tugon, sa Esaias kapitulo 54. Kining tawhana matitud-anon nga nagsusi alang sa kamatuoran busa ang Dios misugo sa iyang suluguon nga si Felipe sa pagsulti kaniya. Si Felipe misugilon kaniya giunsa sa Ginoong Jesus sa pagkamatay sa krus sa Kalbaryo aron sa pagluwas sa mga makasasala. Ang nagbiyahe mitoo ni Ginoong Jesu-Kristo ug unya siya nangutana ni Felipe kon siya makabautismo kaniya. Ang karwahe gipahunong duol sa pondohan sa tubig (ug tan-awa pagayo ang mga bersikulo 38 ug 39), “ug silang duha milugsong ngadto sa tubig, si Felipe ug ang eunuko; ug siya mibautismo kaniya. Ug sa diha nga sila mihawas gikan sa tubig, ang Espiritu sa Ginoo misakgaw ni Felipe palayo, nga ang eunuko wala na makakita kaniya: ug siya milakaw sa iyang dalan nga malipayon.” Sa walay pagduhaduha, kini nagpasabot sa tibuok nga paglubong diha sa tubig ug dili lamang pisikpisikan. Diha sa matag higayon nga ang bautismo gihisgotan sa Kasulatan, kini nagsulti sa paglubong sa tubig.

Karon, unsa ang pagkamahinungdanon niining yano nga seremonyas nga gituman didto sa usa ka dalan sa tungang silangan sa daghang siglo nga miagi, ug ginabuhat gihapon karon?

1. Una, kini usa ka buhat sa pagsugot ngadto sa gipahayag nga kabubut-on ni Ginoong Jesus (Mateo 28:19). Ang katuyoan niini dili ang paghinlo sa hugaw sa unod, apan sa paghatag sa Kristohanon sa usa ka konsiyensya ngadto

sa Dios, nasayud nga siya nagsugot sa Iyang kabubut-on (I Pedro 3:21). Bugtong sila nga nakabati sa Maayong Balita ug mitoo niini ang mabautismohan (Mga Buhat 18:8).

2. Ikaduha, ang Roma 6:3-5 nagtudlo kanato nga kini usa ka hulagway o larawan sa usa ka espirituhanon nga kamatuoran:
 - a.) Ang tubig usa ka larawan sa paghukom ug kamatayon.
 - b.) Sa diha nga si Kristo namatay, siya gilubong ilalum sa mga tubig sa paghukom ug kamatayon aron sa pagbayad sa atong mga sala (Salmo 42:7).
 - c.) Tungod kay si Kristo namatay nga puli alang sa magtotoo, kana nagpasabot nga ang magtotoo namatay uban sa Ginoong Jesu-Kristo. Sa laing mga pulong, sa diha nga si Kristo namatay, ako namatay. Sa diha nga siya gilubong, ako gilubong. Sa diha nga Siya gibanhaw gikan sa patay, ako gibanhaw gikan sa patay.
 - d.) Ang Kristohanon namatay ngadto sa sala, sa kalibutan, ug sa iyang kaugalingon. Siya namatay sa tanan nga iyang gibuhay sa kinaiyahan, ug gikan karon, ang Dios dili makakita sa iyang mga sala. Siya nakakita lamang ni Kristo (Galacia 2:20).
 - e.) Busa sa diha ang Kristohanon nabautismohan, siya maghimo sa magpahayag sa katawhan nga siya misulod sa iyang dapit uban ni Kristo sa iyang kamatayon, paglubong, ug pagkabanhaw; gikan niadto siya mosulay sa pagpadayag uban sa iyang kinabuhi nga ang unod, o daan nga kinaiya, namatay na. Ang bautismo kinahanglan usa ka kahimtang sa kasingkasing sama nga kini usa ka pagapahayag sa pagtoo diha sa gawas sa lawas.

Sa sayong mga adlaw sa iglesia, sa diha ang usa ka magtotoo gibautismohan, sa daghang mga higayon siya gilutos o bisan pa gipatay. Bisin sa ingon, daghang uban pa nga naluwas ug misulod sa dapit niadto unang nangamatay. Karon, sa daghang mga pagano nga nasud, ang bautismo mao ang ilhanan sa pagsugod sa makalilisang nga paglutos. Sa daghang kayutaan, ang pagtoo diha ni Kristo gitugotan samtang ang usa magsugid ni Kristo sa baba lamang. Apan sa diha ang pagapahayag sa katawhan ang gihimo pinaagi sa bautismo, ang mga kaaway sa krus magpasiugda sa gubat batok sa magtotoo.

Apan, bisan unsa ang bili, ang matag usa nga nabautismohan sunod sa paagi sa Biblia nalipay sa samang panghitabo nga naangkon sa Ethiopianhong eunuko. Ang Biblia nagsulti nga, “siya milakaw sa iyang dalan nga nagkalipay.” (Mga Buhat 8:39).

Kon kamo nahibalo niining mga butanga, malipayon kamo kon kamo magbuhat kanila.” (Juan 13:17).

UNSAON SA USA KA KRISTOHANON SA PAGKAHIBALO HAIN SIYA MAKIGTAPOK UBAN SA LAING MGA KRISTOHANON?

Ingon nga pagpasiuna niini nga hisgutanang, atong ipalig-on ang kamatuoran nga ang usa ka tawo nahimong usa ka anak sa Dios sa takna gayud sa iyang pagkaluwas (Juan 1:12,13). Kini nga pamilya sa Dios gimugna sa tanang mga magtotoo diha ni Ginoong Jesu-Kristo nga walay pagpili taliwala sa kaliwat, kultura, o pamanit.

Si Kristo mihugpong sa iyang iglesia sa sayong panahon sa iyang kalibutanon nga pag-alagad uban sa Iyang mga tinun-an. Sa Mga Buhat kapitulo 2, atong makita giunsa sa iglesia pagkadawat sa iyang gahum pinaagi sa Balaang Espiritu sa adlaw sa Pentekostes. Diha sa Kasulatan atong makita ang kapin sa 100 ka mga bersikulo mahitungod sa iglesia. Kining tanan nga mga bersikulo, nagsulti sa lokal nga pundok sa mga Kristohanon nga nagkatigom sa kanunay. Ang usa ka iglesia iya ni Kristo ug ang iyang mga sakop magtapok sa pagsimba ug pag-alagad sa Ginoo. Sa nahiunang mga adlaw niining mga iglesia, ang mga balaan nagkatapok sa ilang kaugalingon nga mga balay (Roma 16:5; Filemon 2). Aton makita nga, “sila nagpadayon nga malig-on sa pagtulon-an sa mga apostoles ug pakigdait, ug sa pagpikas sa tinapay, ug sa mga pag-ampo.”

Karon, dayag kaayo kini nga ang Ginoo buot nga ang mga Kristohanon sa pagtapok sa kanunay ingon nga mga sakop sa lokal nga pundok. Ang Hebrohanon 10:25 naghimo sa pasidaan, “nga dili magbiya sa pagtigom sa atong kaugalingon, sama sa nabatasan sa uban.” Usab, ang dakung bahin sa Bag-ong Pakigsaad gisulat sa pagtudlo sa mga Kristohanon sa kaayohan ug mga katungdanan sa usa nga sakop sa lawas ni Kristo (I Korinto 12).

Hinuon, ang bag-o nga Kristohanon karon adunay suliran sa pagkasayud sa unsa nga pundok nga iyang pilion sa pakigtigom. Adunay daghang mga Kristohanon nga pundok uban sa daghang kalainan sa ilang mga pagtudlo. And mosunod nga lista gitigom uban sa katuyoan sa pagtabang sa bag-ong kristohanon sa pagkaplag sa matarung nga dalan. Sa samang panahon, atong ipahibalo nga kining pagpili kinahanglan himoon uban sa mainitong pag-ampo, aron nga ang kabubut-on sa Dios masunod. Ang atong kahibalo mahitungod sa maayong iglesia, kinahanglan magagikan lamang sa Biblia. Ang nabatasan ug tradisyon sa mga tawo pagasundon lamang kon sila nag-uyon uban sa gisulti sa Biblia (Esaias 8:20).

1. Himoang siguro nga bisan unsang pundok ang imong gihunahuna nagaila sa Biblia nga ang gituga ug dili masayop nga Pulong sa Dios, ug mopailalum sa iyang kaugalingon sa maong Kasulatan ingon nga BUGTONG kagahum alang sa kalagdaan sa pagtoo ug buhat. Dili paigo sa pagsulti nga ang Biblia adunay Pulong sa Dios. Kini ANG PULONG SA DIOS. Busa, ang Biblia hingpit nga tinuod ug kinahanglan kita motapot niini sa pagtoo ug pagsugot. (II Timoteo 3:16,17).
2. Himoang siguro nga ang iglesia nga imong gitambongan adunay tin-aw ug dili malalis nga pagtulon-an sa Tinuod nga Persona ni Kristo. Daghan ang mouyon nga si Kristo usa ka bantugang bayani ug usa sa bantugang mga tawo sa tanang panahon. Daghan ang magtawag kaniya nga “Balaan” , apan ang kamatuoran nga Siya ang atong Minahal nga Manluluwas ug nga Siya usa ka Dios mao lamang ang bugtong pagtulon-an ni Jesus (Kolossas 2:9).
3. Ang ikatulo ka punto nga ang usa kinahanglan magbantay sa pagsusi alang sa usa ka iglesia mahitungod sa mga buhat ni Kristo. Ang mga Kasulatan nagtudlo kanato nga si Ginoong Jesu-Kristo nagpuyo sa usa ka kinabuhi nga walay sala, nga Siya namatay sa iyang kinaugalingon alang sa atong mga sala sa krus sa Kalbaryo, nga siya gilubong ug mibangon pag-usab, nga siya misaka ngadto sa Langit, ug nga siya karon anaa sa tuo nga kamot sa Dios Amahan nga nagpataliwala alang sa magtotoo (I Korinto 15:1-40). Ang kaluwasan maangkon lamang pinaagi sa pagtoo diha Kaniya, dili pinaagi sa maayong mga buhat o tawhanon nga kaayo (Galacia 1:6-9). Himoang siguro nga ang iglesia nagtudlo nga ang bilihong dugo ni Kristo mao ang makahinlo sa tawo gikan sa sala. Kon wala ang iyang dugo walay kapasayloan sa sala.
4. Himoang siguro nga ang iglesia makasubay sa iyang mga pagtulon-an ug mga buhat balik sa Bag-ong pakigsaad . Daghang mga tawo ang nagtukod sa mga iglesia sa katuigan ingon nga mga tig-usab sa mga dautang pagtulon-an o ingon nga magtutudlo sa bag-ong mga kamatuoran. Ang Dios mipadayag sa tanang kamatuoran bisan ngadto sa nahianang iglesia, busa, kinahanglan dili kita mangita alang sa mga bag-ong pagtulon-an ug mga pinadayag. Kon ang usa ka iglesia o pundok makasubay sa iyang mga pagtulon-an ug mga buhat ngadto sa usa ka tawo, nan kinahanglan kita magpalayo niini.

Gawas sa upat ka mga dagkung mga pagsulay nga atong gihatag, ang usa kinahanglan magsiguro nga ang iglesia wala magsumpaki sa mga pagtulon-an sa Biblia, ug mga buhat sa mosunod nga mga mahinungdanong kamatuoran mahitungod sa Kristohanon.

1. Si Kristo mao ang ulo sa iglesia (Kolossas 1:18,19; Efeso 1:22,23). Walay tawo nga makaangkon sa maong katungdanan. Bisan asa si Kristo giila nga mao ang ulo, ang pundok motan-aw Kaniya, ug bugtong Kaniya, alang sa mga sugo ug pagtultol.
2. Ang tanang magtotoo kabahin sa pamilya sa Dios (Juan 1:12,13). Sila kinahanglan pagadawaton ingon nga mga sakop sa iglesia human sa pagsunod sa bautismo. [Adunay duha ka butang nga mahigawas niini: kanila nga ang pagtulon-an dili maayo (II Juan 10), ug kanila nga nagpuyo diha sa sala (I Korinto 5:13). Kini sila dili pagailhon nga tinuod nga mga anak sa Dios). Walay dili magtotoo nga pagadawaton ingon nga sakop, bisan kon siya nabautismohan.
3. Ang tanang Kristohanon mga pari (I Pedro 2:5,9). Sa Bag-ong Pakigsaad walay kalainan tali sa mga pari ug pundok. Ang tanang Kristohanon makahimo karon sa pagsulod pinaagi sa pagtoo ngadto sa atubangan sa Dios, nga magdala sa mga sakripisyo sa pagdayeg, pagsimba, ug pag-alagad. Sa nahiunang iglesia, ang tanang sakop mga magtutuon sa Biblia, ang tanan nagkabig sa mga kalag, ug tanan adunay buhat alang sa Dios. Kinahanglan kini tinuod sa matag lokal nga iglesia karon.
4. Ang kagahum sa Balaang Espiritu kinahanglan maila. Bisan kon kini sa pagsimba, pag-alagad, buluhaton, o pagdisiplina; kinahanglan adunay kagawasan alang sa Espiritu sa pagbuhat. Ang iyang pagtultol ug buluhaton kinahanglan dili mapugngan sa tawhanon nga seremonyas o pagdumala (II Korinto 3:17; Efeso 4:3).
Sa pagbalik, ang bagong kristohanon kinahanglan adunay pakigdait uban kanila nga adunay Biblia nga ilang bugtong giya, kinsa nagtudlo sa kamatuoran sa persona ug buhat ni Kristo, ug nagsulay sa pagtuman sa mga pagtulon-an sa Bag-ong Pakisaad mahitungod sa iglesia ug iyang buhat.

PAGTINGUHA SA KABUBUT-ON SA DIOS

Ang Kristohanon masayud ba sa kabubut-on sa Dios alang sa iyang kinabuhi?

Ang Kristohanon kinahanglan adunay dakung tinguha sa pagkasayud sa kabubut-on sa Dios sa iyang kinabuhi. Kon ang usa wala mahibalo ug magsugot sa plano sa Ginoo alang sa iyang kinabuhi, nan kana nga kinabuhi nausik ug mawala ang kahimuot gikan sa Agalon.

Ang Kasulatan dayag kaayo sa pagtudlo nga ang Dios nagpadayag sa iyang kabubut-on ngadto kanila nga buot mahibalo niini (Juan 7:17). Kini usa ka maayong kahigayonan nga kinahanglan mahitabo sa matag Kristohanon (Roma 12:2).

Bisan kon ang usa nagapangita sa kasulbaran sa suliran sa kuwarta o buhat, ang mosunod nga lima ka mga lakang kinahanglan masunod:

1. **PAGPASAKOP.** Ang pagpasakop mao ang pagtugyan sa imong kaugalingon ngadto sa Ginoo. Kini nagpasabot sa pagpadaplin sa mga gilauman, mga pangandoy, o mga tinguha. Kini nagpasabot sa kinatibuk-an nga pagtinguha sa kabubut-on sa Dios. Si Pablo nagpasakop sa diha nga siya miingon, “Ginoo unsa ang buot nimo nga akong buhaton?” (Mga Buhat 9:6). Si Esaias nagpasakop sa diha nga siya miingon, “Ania ako; pagsugo kanako.” (Esaias 6:8). Si Amasias nagpasakop tungod kay atong mabasa nga siya kinabubut-on nga mihatag sa iyang kaugalingon kang Jehovah (II Chronicas 17:16).
2. **PAGSUGID.** Kon kita nagtinguha sa pagpatunga sa iyang kabubut-on, kinahanglan kita magsugid mopadaplin sa tinagoang mga sala nga atong gikuptan. Hinumdomi ang mga pulong sa Salmista, “Kon ako magpalandong sa kadautan sa akong kasingkasing, ang Ginoo dili mamati kanako.” (Salmo 66:18). Kita kinahanglan usab magsugid sa atong kakulang sa gahum ug kusog, ug magsalig sa iyang gahum (Salmo 139: 23,24).
3. **PAG-AMPO.** Kini yanong nagpasabot nga kita kinahanglan moduol ngadto sa Ginoo sa gitakdang panahon, nga mangayo sa iyang pagtultol. Kita kinahanglan mangayo sa Iyang saad sa paggiya, nga mangayo kaniya sa pagbuhat sa iyang gisulti. Ang atong mga pag-ampo kinahanglan maghimaya kaniya nga mao ang pinakaunang tumong (Kolossas 1:9; 4:12).

4. **PAGTUON.** Paghatag sa panahon diha sa Pulong sa Dios. Basaha kini sa diha nga ikaw anaa sa imong mga tuhod nga mangayo sa Dios sa pakigsulti kanimo pinaagi niini. Basaha kini sa hinayhinay. Pagbasa niini uban sa pagpamalandong. Pagbasa niini uban ang pagpaabot (Salmo 119: 18; 129:36).
5. **PAGTUKAW.** Kon ang Dios dili dayon motubag dihadaha, pabilin (Salmo 62:6). Kon ikaw nangayo sa Dios sa pagtultol ug walay tubag nga moabot, nan ang kabubut-on mao nga ikaw magpabilin asa ikaw. Kon ikaw tinuod nga nagsalig sa Ginoo, ikaw dili mabalaka. “Siya nga nagatoo dili magdali.” (Esaias 28:16). Ang Dios makapadayag sa kabubut-on sa daghang mga paagi.

Ang Dios mahimong mogamit sa usa o nagsagol sa mosunod nga mga paagi sa pagpadayag sa iyang kabubut-on.

1. Pagtultol pinaagi sa Biblia. Ang Kasulatan maghatag sa pagtultol sa duha ka paagi. Una, sila sa dayag magdili sa pipila ka mga buhat. Pananglitan, kon ang usa ka Kristohanon mag-ampo nga mangayo alang sa pagtultol kon siya magminyo sa usa ka dili magtotoo, siya makakita sa tubag sa Dios sa II Korinto 6:14. Sa laing bahin, ang Dios mogamit sa mga bersikulo sa Kasulatan sa pagtultol kanato ngadto sa usa ka buhat. Ang usa ka bersikulo nga kaniadto wala makadani sa imong pagtagad mahimong makahatag sa bag-ong kahulogan tungod kay kini nagsulti sa butang nga gikinahanglan sa takna sa imong pag-ampo alang sa pagtultol sa Ginoo (Salmo 119:105).
2. Pagtultol pinaagi sa ginikanan. Walay usa kanato nga nagpili sa atong ginikanan. Ang Dios naghatag nganhi kanato aron sila makatultol kanato. Ang Dios magbuhat pinaagi kanila sa pagpadayag sa Iyang kabubut-on (Efeso 6:1,2).
3. Pagtultol pinaagi sa ubang mga Kristohanon. Usahay maalamon kini nga mangita sa tambag sa maalamon ug hamtong nga mga Kristohanon. Ang ilang naagihan makaluwas sa usa ka batan-on nga Kristohanon gikan sa pagkahulog (Hebrohanon 13:7,17).
4. Pagtultol pinaagi sa mga panghitabo. Tungod kay ang Dios nagdumala sa kalibutan, Siya makaplano sa mga panghitabo sa atong kinabuhi sa pagpadayag sa Iyang kabubut-on. Ang usa ka sulat, pananglitan, moabot sa panahon sa higayon nga kita nagkinahanglan sa pagtan-aw sa dalan sa kabubut-on sa Dios.
5. Pagtultol pinaagi sa Balaang Espiritu. Ang Balaang Espiritu makausab sa atong paghukom, mga tinguha, ug mga gikilingan sa paagi nga kita makasunod sa kabubut-on sa Dios. Niana nga mga panghitabo, ang

Iyang pagtultol matin-aw nga ang pagdumili mao ang pagsupak sa Dios (Mga Buhat 11;12; 16:6,7).

Katapusang pamulong. Sa diha nga ang Dios maghatag sa kahayag, lakaw niini (Mga Buhat 26:19). Kini nga pagtultol kinahanglan tumanon alang sa dugang nga pagpanguna sa pagpadayon. Ang pagkamasinugtanon mao ang pasikaranan alang sa usa ka kinabuhi nga uban sa kalipay ug mohangtud nga bili.

PAG-AMPO UG PAGDAYEG

Unsa ang gitudlo sa Biblia mahitungod sa pag-ampo?

Walay pag-uswag sa Kristohanong kinabuhi nga walay pag-ampo. Busa, mahinungdanon kini, nga ang usa ka Kristohanon mahibalo unsa ang gisulti sa Biblia mahitungod niini nga hisgutanan.

1. Nganong kinahanglan kita mag-ampo? Tungod kay ang Biblia nagmando kanato sa pag-ampo. (I Timoteo 2:8). Ang Ginoong Jesus mao ang usa ka tawo sa pag-ampo. Kon siya mibati sa pagkinahanglan alang niini, unsa pa ka daku nga kita mag-ampo! (I Tessalonika 5:17,18; Efeso 6:18).
2. Unsa ka daghan kita mag-ampo? Ang Biblia nagsulti sa “Pag-ampo nga walay hunong.” (I Tessalonika 5:17). Kini nagpasabot nga kita sa kanunay andam ug makahimo sa pag-ampo. Kita kinahanglan makahimo sa pagduol sa Dios sa bisan unsa nga higayon. Sa samang higayon, kinahanglan kita nga mogahin sa inadlaw nga panahon sa pagpakigsulti uban Kaniya. Sa diha nga kita mobangon sa buntag, ug sa diha nga kita motapos sa adlaw, kinahanglan kita makigsulti sa atong Ginoo. Kon kita anaa sa katawhan o sa tago, kinahanglan kita magpasalamat Kaniya alang sa atong mga pagkaon.
3. Sa unsa nga kahimtang kita mag-ampo? Si Daniel miluhod sa pag-ampo (Daniel 6:10). Sa ingon man ang atong Ginoo (Lukas 22:41). Si Nehemias, hinuon, nag-ampo nga nagtindog atubangan sa hari (Nehemias 2:4). Sa kasagaran, kita magluhod sa diha nga anaa sa tago. Hinuon, ang Kristohanon adunay maayong kaayohan sa pagpakigsulti uban sa Dios bisan nga siya naglakaw sa dalan o anaa sa iyang inadlaw nga mga buhat.
4. Unsa ang angay nga igaampo? Ang Kasulatan magtubag niini nga pangutana sa Filipos 4:6; I Timoteo 2:1-3, ug sa Mateo 9:38. Walay gamay kaayo o daku kaayo nga dili madala ngadto sa Ginoo sa pag-ampo. Daghan ang nakakaplag niini nga mapuslanon sa paghimo sa usa ka listahan diin sila makatan-aw niana nga panginahanglan sama niini:
 - a.) Mga ngalan sa higala o kabanay nga dili magtotoo.
 - b.) Mga ngalan niadtong nasakit o adunay pinasahi nga kinahanglan.
 - c.) Mga ngalan niadtong nagsilbi sa Dios, sama sa mga misyonaryo, ebanghelista, pastor, magtutudlo, ug uban pa.
5. Mga gikinahanglan aron ang pag-ampo tubagon:
 - a.) Kon kita magpabilin diha ni Kristo, ang atong mga pag-ampo pagatubagon (Juan 15:7). “Pabilin diha ni Kristo” nagpasabot sa pagsugot sa iyang mga Kasugoan (I Juan 3:22).

- b.) Ang atong mga pag-ampo kinahanglan nga sumala sa Iyang kabubut-on (I Juan 5:14). Tungod kay ang kadaghanan sa kabubut-on sa Dios gipadayag pinaagi sa Biblia, ang atong mga paghangyo kinahanglan dili masumpaki sa unsa ang napadayag sa Dios diha sa Kasulatan.
 - c.) Ang atong mga pag-ampo kinahanglan diha sa ngalan ni Kristo (Juan 14:13; 16:23). Sa diha nga kita tinuod nga mag-ampo sa Iyang ngalan, kini sama nga si Kristo sa iyang kaugalingon ang nakigsulti ngadto sa Dios nga Amahan.
 - d.) Ang atong mga katuyoan kinahanglan putli (Jacobo 4:3). Kon ang atong mga tuyo kinaugalingon o makasasala, dili kita makalaum sa Dios sa pagtubag.
6. Ang mga sinultihan sa atong mga pag-ampo. Kinahanglan kita mag-ampo ngadto sa Dios uban ang pagkahadlok, magsulti sa maayo ug matinahuron.
7. Mga dili angay sa pag-ampo:
- a.) Ayaw pag-ampo aron makita sa uban.
 - b.) Ayaw pangayo sa Dios sa bisan unsang butang nga imong mabuhat. Walay Kristohanon nga anaa sa iyang matarung nga panghunahuna nga moatubang sa nagdagan nga sakyanan ug unya mag-ampo sa Dios nga magmilagro sa pagpahunong sa sakyanan. Ang Dios naghatag kanato sa mga tiil aron sa pagpakilid sa dalan.
 - c.) Ayaw pangayo sa Dios sa butang nga dili angay nimong batonan. Ang Dios usahay magtugot nga kita makaangkon niana, apan usab mohatag kanato sa kanihit sa kalag (Mga Salmo 106:15).
 - d.) Paglikay sa kawang nga pagbalikbalik (Mateo 6:7; Ecclesiastes 5:2).
8. Ubang mga sugyot:
- a.) Kon imong makita nga ang imong hunahuna naglatagaw, sulayi ang pag-ampo nga kusog. Kini makatabang sa imong pagsunod sa nalitok.
 - b.) Ayaw pagkaluya kon ikaw wala dayon matubag dihadiha. Ang mga tubag sa Dios dili sayo kaayo nga kita mawad-an sa panalangin sa pagpaabot kaniya, o dili kini langan kaayo nga ang atong pagsalig kaniya mahimong walay pulos.
 - c.) Kon ang tubag sa Dios dili mao ang imong gipangayo, hinumdomi kini: Ang Dios adunay katungod sa paghatag kanato sa labing maayo kay sa atong gipangayo. Kita wala masayud sa pinakamaayo alang kanato, apan Siya lamang. Siya makahatag kanato sa labaw pa sa atong gipangayo o gihunahuna (II Korinto 8:9; Efeso 3:20).

PAGSAKSI UG PAGKABIG SA MGA KALAG

Unsaon sa usa ka Kristohanon sa pagdala sa uban ngadto ni Kristo?

Ang pagkabig sa mga kalag mao ang usa sa mga pinakadaku nga mga buhat sa kalibutan karon. (Panultihon 11:30). Bisan walay mga kalagdaan sa pagsiguro sa kalamposan niini nga buhat, adunay pipila ka mga prinsipyo nga magdala sa mga bunga.

1. Mahinungdanon kaayo kini nga ang mangangabig maayo ang espirituhanon nga kahintang. Siya kinahanglan nga kanunay magkaon sa Pulong sa Dios. Siya kinahanglan mogahin sa dakung panahon sa pag-ampo. Magpasakop siya sa Dios. Magsugid ug mobiya siya sa iyang sala. Sa diha nga maglakaw siya diha sa Espiritu, ang Kristohanon makakita nga ang Ginoo maghatag sa kahigayonan sa paghatag sa maayong pagsaksi. Kini ang Bulawanong Lagda sa mga mangangabig: “Pagkinabuhi nga duol sa Dios.” (Mateo 4:19).
2. Usa ka maayong butang sa pagsugod sa matag adlaw nga mangayo sa Dios sa pagdala kanato ngadto kanila nga buot niya nga makabati sa Maayong Balita. Dayag kaayo kini nga kita dili makasaksi sa tanang tawo nga atong makita. Tin-aw usab kaayo nga kita walay kasayuran kinsa ang “hinog” na sa kaluwasan; apan, kon kita magtugot sa Ginoo sa pagtultol kanato, atong mabuhay nga maayo ug makaani sa daghang bunga alang Kaniya.
3. Mangita kita sa kahigayonan sa pagsulti mahitungod ni Kristo. Kon diha sa mga buhatan adunay mogamit sa pagpasipala sa ngalan sa Ginoo, kini usa ka maayong higayon sa pagsaksi alang ni Kristo. Ang relihiyosong paghisgot moabot ug maayo usab nga higayon. Usab, dili kita maghulat sa kanunay alang sa kahigayonan nga moabot kanato. Ang matag usa gawasnon sa paghisgot mahitungod sa politika, paugnat, klima, ug uban pa. Nganong dili kita gawasnon sa paghisgot mahitungod sa espirituhanong mga butang?
4. Pagkutlo sa Pulong sa Dios sa makadaghan. Kini usa ka Buhing Pulong (Hebrohanon 4:12)! Kini adunay daghang gahum sa pagkab-ot sa mga kalag kay sa atong mga pulong. Kini ang Espada sa Espiritu ug ang matag sundalo ni Kristo kinahanglan mahibalo unsaon sa paggamit niining pinakagamhanang hinagiban. Sa daghang mga higayon, ang mga dili magtotoo magbuhay sa tanan nilang mahimo sa pagbabag sa imong

paggamit sa Kasulatan, apan ayaw paghunong. Kon sila moingon nga sila dili motoo sa Biblia, pagkutlo sa dugang pa.

5. Pagsubay sa tawo nga imong nasultihan. Dili kini kasagaran nga ang usa ka tawo maluwas sa unang higayon nga siya makabati sa Maayong Balita. Kadaghanan, ikaw kinahanglan nga mosulti kanila pagbalikbalik. Pagpakita kanila sa kaayo. Paghatag kanila sa maayong mga basahon. Pagdapit kanila sa pagtambong sa pagsimba uban kanimo. Labaw sa tanan, pag-ampo alang kanila. Ayaw pagkaluya kon daghan ang masuko batok kanimo. Kini nga pagsupak usahay usa ka ilhanan nga sila gitandog sa Balaang Espiritu. Ang pagkawalay pagtagad mas mangil-ad kay sa pagbatok.
6. Ayaw pagsulay sa pagkuha sa dinadali nga hukom. Ang bakak nga pagsugid dili lamang walay kapuslanan, apan kini maglimbong kanila sa paghunahuna nga sila matarung uban sa Dios. Makadaut kini sa Kristianismo. Pagmakanunayon sa pagtanom sa maayong binhi. Ang Dios mao ang magpatubo niini.
7. Kon ikaw maglisod sa pagsulti ngadto sa uban mahitungod ni Kristo, pag-ampo ug pangayo sa Ginoo sa kusog ug kaisog sa pagpamatuod alang Kaniya. Kon ikaw gayud buot niini, Siya mohatag niini kanimo.
8. Sa kanunay pagdala sa mga basahon uban kanimo. Ikaw dili lamang makahatag niadtong imong nakasulti, apan usab makabilin niini sa mga publikong dapit nga imong naduawan.

Ang mga ganti sa pagpangabig sa mga kalag daku kaayo:

1. Ang kalipay sa pagdala sa kalag ngadto ni Kristo dili maasoy (Lukas 15:10)!
2. Usa ka dakung kalipay didto sa langit kay sa adunay mopabati kanimo nga mag-ingon, “Ikaw ang nagdapit kanako dinhi.”
3. Sa katapusan, unsa ka dili matandi nga pagbati ang atong maangkon sa diha nga ang atong Ginoong Jesu-Kristo magsulti sa langitnong pundok mahitungod sa atong pagpangabig (Mateo 10:32)!

Ang atong pag-ampo kinahanglan mao nga, “Tugoti ako sa pagtan-aw sa panon sama sa Ginoo, hangtud nga ang akong mga mata napuno sa mga luha. Tugoti ako sa pagtan-aw sa nahisalaag nga karnero uban sa kalooy, ug mahigugma kanila tungod sa akong gugma alang Kaniya.” (Mateo 9: 36).

UG KARON...

UNSA ANG MOSUNOD?

Kami nagpahalipay kanimo sa paghuman niini nga kurso sa kinabuhi sa Ginoong Jesu-Kristo. Sa pagdawat sa imong nahuman nga pagsulay, kami mokorehe niini ug magpadala kanimo sa sunod nga kurso. Adunay daghan nga mga kurso nga among ikahatag kanimo nga makahatag sa espirituhanong kaayohan.